

Cuant che si faseva la “Festa degli alberi”

Sji sta scuvierzint tas scuelas la impuartancia didatica ch'a à la “Fiesta dai arbui” pai scuelârs das elementârs, siguramenti a à tant da insegnâ ai fruts di vuei che no àn tantas ocasions di jessi a contat cu la natura, come che a era par chei di una volta, simpri par prâts e par boscs. I gjaulets tecnologjics a ur rouba il timp par chescj interes, cunsiderant che oltri a passion a richieit encje fadia e chest no ur garba trop.

Par nou a era veramenti una zornada da no dismenteâ.

Ai partecipava chei di quarta e di quinta. Naturalmenti si faseva di primavera, una das poucjas ocasions di una lezion al aperto. Si sa che vevin scuola dut il dì, cun la pausa di dôs oras dopo di miedì. Ma in che zornada fasevin duta una tirada. I maestris cu la forestâl a stabilivin la zornada e il lûc dulà che a sji veva di lâ a fâ la fiesta, jo sei stada in Busadors e di chê banda sot la Cantoniera.

Sji partiva in fila, cjantant di lunc, rivâts sul puest, a erin za doi, trei forestâi che vevin preparât tantas busâs tancj che ai erin i scuelârs. Dopo vei pousât, nus davin un arbulut paron, a podeva jessi un peç, una dana, un larisj o un fau.

Judâts dal forestâl, vevin di implantâ l'arbulut ta bûsa, cuvierzintlu cu la cjera benon, ator ator, dopo pescjuriâlu ator par fisâ la cjera, butâ sora un cop di aga e fata l'opera, intant ch'al rivava il to turno erin ducj intor a asisti a l'operazion. A voleva un biel pôc di timp parce che erin un bon pousj di fruts in chê volta.

Intant al rivava miedì, sentâts cuietuts, spietavin il panin cu la mortadela e una tacia di aranciada, cun tun mêl par ogniun. Erin plens di fan e mai marinda a era plui buina.

Dopo mangjât il forestâl nus dava lezion di botamica dal vêr, nus spiegava i nons das plantas, la lôr diversitât e carateristica, las rosas e las lôr varietâts e dut ce che a compuartava chesta materia, devûr ce che cjatavin sul teritori.

Infin, simpri cjantant, contentons, tornavin a cjasa. Cualchi volta si faseva encja una foto di grup, pal che al fos restât un ricuart di chê biela zornada. Il plui dai viaçs a finiva prin dal solit orari di scuola, cussì, oltre che biela a era ancje una zornada plui curta.

No par ducj però al era compagn, cui che sji impensa che inveza a ur davin un arbul da puartâ a cjasa e implantâlu dulà che tu volevas; di solit chest al era un cocolâr o encja chei perârs che a son dongja la strada, via par Faeit ch'a fasin pêrs Martins bons doma par fâ il most, encja chei plantâts da fruts di scuola ta “Fiesta dai arbui”.

I scuelârs che vuei a àn una cincuantina di agns a contin che la maestra Lionilla da Palucia ch'a faseva scuola a Tamau a à ravuelt encja i fruts di Cleulas par fâ fieste insiema ai siei, coinvolzint il so om Rino (ex Sindic) a fâ da autist cu la sô machina (una citroen) par traspuartâ i fruts fin tai paragjos da “Casetta in Canada”. L'à scugnût fâ plui viaçs fûr e denti cu la machina cjamada al massim. Aveni dopo avei implantât i arbui, dopo i Alpins ur vevin preparât la pastasciuta. E ce mangjada, contents come una pasca da bielza zornada. Cualchidun inveza a sji impensa di jessi stât a fâ la fiesta ta Pocia.

Cumò però mi samea ch'a è difarent, mi pâr ch'a van cu la forestâl a fâ un zîr pal bosc, dulà ch'a ur spieghin la conformazion dal teritori, ce ch'al prodûs, las varietâts di plantas e di rosas, il rispjet pa natuta e via indevant e par finî a plantin un pâr di

arbuluts magari tal curtîl da scuela. Un brâf maestri di Darta al tol un troput di fruts, chei plui granduts e van propit a fâ una cjaminada in mont, insiema ai forestâi, par dâur chestas leziions e dopo cun lôr a durmî encja una not fûr, tai rifugjos o tas casermas. Par un pâr di dîs a tocjin cun man, come ch'as sji dîs, ce ch'al è la mont ce ch'a da e cemût che si po doprâ chestas risorsas, come par esempli creant ativitâts turisticas come in Premôs o Lavareit... dulà ch'a sji prodûs ducj i derivâts dal lat (formadi, spongja, scueta frescja e fumada), che cun chei passjons incontaminâts ad alt, a àn sigûr un lat ch'al da il miôr dai savôrs. E po tu pos encje asisti a lavorarazion. A jodin cussì sperimentâ la fadia che a costa la mont, ma ancje la sodisfazion ch'a sa dâcji che no tu cjatas in nissuna ata banda, coma la variazion dal panorama, che tu as par devant apena spostancj di pouc: i riûts di aga glaciada, cualchi volta un lâd di aga cristalina, come in Premôs, Zuplan... concjas e distesas verdiscinas, trats di bosc, plantas inturcitadas che il vint las à modeladas in forma strana, crets, gravons, trois. Sintî scivilâ las marmotas, jodilas enfra i clapons ch'a cji stan a spiâ dretas in pîts a seguî ogni piçul rumôr coma saetas a cori tas busas e galarias sot cjera das lôr tanas e tancj aitis anemai al è chei che di di al è râr podei jodi, ma tu jouts las lôr ombras, encja viparas tu pos incuintrâ cjaminant e tal cîl volteggjâ falcs e falchets e se tu âs fortuna, parfint l'acuila.

E po rosas di ogni forma e colôr unicas e raras, pensa doma ai plaçâi di rododendros ros, as stelas alpina d'estât e plui in alt e raras las regjinas e i giglios di mont, las scarputas da Madona (o orchideas di mont) las genzianas blu, i botons zâi da l'arnica e tantas âtas che no san i nons. Po las jerbas officinâls, usadas tant in erboristeria, par curâ encja i malans. Chestas a son leziions di vita che sui bancs di scuela no tu pos imparâ e cji restin tal cûr par simpri. Biâsj chei fruts di citât che no podin vei chesta fortuna.

E un'ata bieles iniziativa, ch'al à il sindic simpri di Darta, cuant ch'al nas un frut, dopo un pouc, lui insiema al fruts e ai gjenitôrs a tolin un arbul (ch'al pos jessi di cualsiasi varietat) e a van a implantâlu (di solit via par Alzars), metint su una targuta cul non dal piçul e la sô data di nasita. Dopo al sarà lui che plui indevant al varà di vei cura dal so arbul. Gno nevout al veva un cocolâr, ogni tant lu lava a cjatâ e al era simpri plen di furmias ch'a lu tudavin e no lu lassavin cressi e lui a butâi spray par copâlas, chei altri arbuis dongja a veignivin su a voli vidint. Ogni volta che passavin pa strada al vosava su par incitalu: “Dai, dai, cres!” e finalmentri al è cressût e al à cjapât chei aitis. Chest atom i nostis fruts no an podût fâ chesta fiesta par via dal maltimp che al era simpri freit e di ploia. Mi pâr che i àn cambiât encja il non: cumò no è plui la “festa degli alberi”, ma “giornata ecologica”.